



Arunachal Pradesh nung 'tourist circuits' tali amenoktsü

North Korea-i tzüym nung ballistic missile anakhaloktsü



VOL. XVIII NO. 161 (ADOK 161) DIMAPUR

ROGONÜ (FRIDAY)

METSÜREMI (MARCH) 26, 2021

₹ 5.00

Nagaland COVID-19: Nisung tasen asem dak COVID-19 putet

Kohima, Metsüremi/March 25 (TYO): Brehostibarnü Nagaland nung COVID-19 cases nisung tasen asem dak jangjateta tang state nung iba tashidak agi meneper ajak senteper 12,229 jungogo aser shiranger ka asüba ajanga state nung iba tashidak agi meneper asür nisung ajak agi 92 jungogo.

"Tanü Dimapur nung COVID-19 +ve cases asem liasü," ta Health Minister S Pangnyu Phom-i tweet ka nung ashi.

Iba tashidak agi meneper rongnung taneptsü angur 11,979 lir, aser ibaji ajanga recovery rate ya shilem 97.95 alitsü, ta Director, Health and Family Welfare, Dr Denis Hangsing-i anogoshi COVID-19 osang metetdaksüba nung shia lir.

Tang state nung active cases

pezü lir, ta pai ashi.

Danga tashidak keta alir nisung 10 densema ajak senteper nisung 92 tashi iba tashidak agi süogo, aser ano ka asüba indang bushisüngdangba mapang lir, ta pai ashi.

Ajak senteper COVID-19 agi shiranger nisung 154 danga state temi ogo, ta ashi.

Tang active cases pezü ya Dimapur nung asem aser Kohima nung ka lir, aser parnok ajak ya asymptomatic lir, ta pai ashi.

Nagaland nung COVID-19 alitsü südi ta temolung melemi sample 1,35,646 tendangogo. Itemji RT-PCR nung 75,324, TrueNat nung 37,512 aser Rapid Antigen Test nung 22,810 tendangogo, ta Dr Hangsing-isa ashi.

Marksheets taila yanglur nisung asem apu



Dimapur, Metsüremi/March 25 (TYO): PHQ SIT, CID Branch nungi Dy. SP (Crime)-i anir sepai telok kati, Guwahati nung amendaker aliba IT professional telok kati Nagaland nungi kaketshirtem atema Marksheet aser tanga HSLC & HSSLC educational certificate taila yangluba potetogo.

Iba ken o dak sendakba nung SIT-i, ita kashi meita ataba sülen Assam kübok tesem balala nungi Mohbubur Rashid Choudhury @ Manoj Das, Rahul Sen @ Rajat yadav aser Jinna Razzakul Alom @ Mitul Alom puogo.

Aija alirtem rongnung tongtiba, Mohbubur Rashid Choudhury, Beltola, Guwahati nung apu aser tanungba ana ya Kokhrajhar, Assam nung apu.

DIG (CID) aser SP (Crime) Nagaland lenisüba nung SIT den Cyber cell PHQ aser CFL Chumukedima longjemer Beltola, Guwahati aser Kokhrajhar Assam meita ao aser Marksheet taila, NBSE nung tongti ketdangsürtem indang seal, sen, laptop aser tang electronic hadirtem amala kuli kaketter aser tanga kulitem ngutetogo.

Iba telok ya Career Today Nagaland & Edumart Naga tenüng nung inyaksangshia liasü.

Kasa mapang nung parnoki parnok sasa iba taila career aser placement consultants indang Director aser executive tem ama jilushia inyak aser college tem dang admission atema kaketshirtem anir arutsütsü nangzüka institutes tem ashio kja liasü.

Iba telok yagi institute tem nem kuli kaket taila agütsü aser senzüsenpong aser tanga tenüngdakba maparen balala dak atemer linük nung institute tem nungi sen aika alozüka agiogo.

SP, Crime sangdong ka ajanga ashiba agi, Tamil Nadu, aser Karnataka nungi technical institutes balalai marksheet aser tanga educational certificates tem asadangsü atema NBSE dangi yokbatem talila aliba ngutetba sülen NBSE mendenbubai PHQ nem osang agütsü aser iba sülen ken o temai adok.

Aija alirtem ya tang police ket nung lir aser iba ken o nung sendaka alirtem potettsü atema tang ken o bushisüngdangdar. Maneni police-i nüburtem dang iba amala ochi mashi maparen meita atatsü metetdaksüogo, kechiyong ozüng raksartemi tang wara pokteter aliba maongka agia online ajanga tashioktsüba maparen balala inyaker.

'Smoke free Kohima city' committee senden menogo

Dimapur, Metsüremi/March 25 (TYO): 'Smoke free Kohima city' sub-committee mezüngbuba senden Kohima Municipal Council's Conference Hall nung March 25 nü menogo. Iba senden ya sub-committee Convenor & SDO (C) Sadar, Kohima, Daniel Angami lenisüba kübok agi.

Senden nung convenor-i züngsemtem dang, sub-committee ya 2020 küm November 20 nü District Tobacco Control Cell, Kohima, District Level Coordination Committee (DLCC) senden amenba mapang tentettsü ta metetdaksü. Paisa, Committee ya 'smoke free Kohima city' sentong achaayangtsü atema tentet, ta ashiba den züngsemtem dang iba sentong takok asoshi parnok tebilemdangbatem lemsateptsü ayongzük.

State Nodal Officer (National Tobacco Control Program (NTCP), Dr. C. Tetso, shiba iba senden nung dena liasü, pai moko achiba nungi jenboa lidaktsütsü atema asatetba ya yimti talidak tajungba ka kümdaktsütsü asoshi lir ta ashi. Department-i 2021 küm April ita nungi tenzüka

district headquarters ajak nung smoke free campaign amenoktsü sentong yanglur aliba metetdaksüba mapang Kohima ya state yimtiba asünung iba sentong takaratiba nung achaayanga inyaktsü aser tanga district tem dang tatishitsü tajung sayutsü ayongzük. Paisa, Kohima Smart City den senden amenba mapang Kohima Smart City' Project nung 'smoke free Kohima city' bendenloktsü shidangba metetdaksü.

Maneni Dr. Tetso-i, International Union against Tuberculosis & Lungs diseases-i COTPA benokba asadangsü atema taküm Kohima aser Wokha semdangatsü ta metetdaksü aser committee dang district nung parnok maparen tashi itshidaktsütsü ayongzük.

Kasa mapang nung District Nodal Officer, Kohima Dr. Arenla Walling-i, moko agi yangluba chiyongtsütem aser talisa moko atsür achiba ajanga temang nung timtem adokdaksüba indang tangazükba agütsütsü asoshi 2016 küm April 28 nü rally

ayongzüka agiba mapang Kohima yimti ya tobacco smokes free yimti kümdaktsütsü sangdongogo, ta ashi. Iba sangdong dak ajemdaker 2016 küm May ita 26 nü DLCC senden amenba mapang 'smoke free Kohima city' sentong asoshi COTPA 2003 kübok guidelines aser tinyaktsütem asatapa liasü, ta laisa shisem.

Maneni Dr. Arenla-i, 'smoke free Kohima city' indang guidelines aser tinyaktsütem lemsatet, aser lai guidelines dak ajemdaker mapa karbo inyakogo, ta ashi.

Senden nung züngsemtemi 'smoke free Kohima city' sentong benoka inyaktsü atema parnok tebilembatem lemsatet aser iba inyakyim District Office ajak nung benoka inyaktsü, lokti adenshiba tesem nung nüburtem achaayangtsü, sorkar tenzükertem tenangzüktepba agitsü aser ambassador ama Angami Women Organization, Angami Youth Organisation aser Kohima Village Youth Organisation anisemer iba sentong takok asoshi inyaktsü telemtetba agi.

Longkong yim dak ki 12 rung tok

Mokokchung, March 25 (TYO): March 25 nü aiaterm 12:30 ako meta Mokokchung district kübok Longkong yim dak kitsük kirung lendong tulu ka ataloka iba lendong nung ki 12 rung tokogo. Ki 12 rongnung ki 8 bo mitsü kümogo aser ki 4 terara rung tok, saka tia junga iba lendong nung nisung tasü-tama aser yiruyipongba atalokba kecha maliasü, ta Mokokchung Police osang ajanga jangjaogo.

Mezüng mi adokbaji tantsür-tambur aliba ki ka nungi liasü aser iba mi adokbaji par semchiri tama meteta ar sangoktsü. Fire brigade pur yim atongdangbo mi ji yimertemi remseper liasü, ta police osang ajangasa metetdaksü.

Mezüng bushisüngdangba mapang mi adokba ya electricity/



light meshitakba (short circuit) nungi adokba amai bushiteter, ta iba osangbeneri Police ketdangsür ka den jembidang pai ashi.

Iba kitsük kirung lendong nung rongsen kwi lalu, ibaji tang asadangba mapang lir aser iba dak sentakba nung bushisüngdangba maparen tenzükogogo, ta police

ketdangsürisa shisem.

Iba osang angashia Mokokchung Deputy Commissioner, Limawabang Jamir aser Mokokchung SP, Vishal IPS nati Longkong yim tsüngdong oa semdanga liasü. Longkong yim ya Mokokchung town nungi kilometer 20 shi pilar lir.

Lokti tentet balalai Lamhainamdi lendong aitsür

Dimapur, Metsüremi/March 25 (TYO): Peren district kübok Lamhainamdi yimtsüng nung March 22, 2021 nü mejangjaba nisungi taochi mesayur nisung asem tepsetba atema NDPP ajanga aitsür, ta NDPP Media & Communication Committee ajanga sangdong ka nung ashi.

Mangatetep aliba ken o tem administration aser ozüng amshir dangi bener arutsü melenä nüburtemi pei kabu nung ozüng amer nisung tepsetba ya taoksatsü mapa ka lir.

Ozüng amshirtemi item nisungtem ya aputsüla aser ozüng agi melaba ama temerenshi agütsütsüla. Sorkari

menua melie aibelener pua ozüng temaba südaktsütsüla, ta ajungshir, aji asünung dang nüburtem pei li nung tetsübu makai alitsü. Maneni NDPP ajanga nübur ajunga dang ozüng sülen anidaktsü, aser tali tongtipangsa Khristan yimya nung alitsü aser azüdokshi nungi pila alitsü ayongzüker, ta sangdong ajangasa ashi.

Maneni shidak bilemba nübur ajak dang iba tatalokba nungi kin balala tsüngta mangatetep aser mepetmesü adoktsüsa inyaksangshiba aser jembishinüba nungi pila alitsü ajungshir.

Naga nungeri chichiba yimjung asoshi meranga

nokdaksüla aser tali angatetjemtsü asoshi inyaktsüla, aji asünung dang asenoki aginüba ama teti asoshi yimjung ngutettsü, ta NDPP ajanga ashi.

Peren district kübok Lamhainamdi yimtsüng nung tai maket nisung asem dang taochi mesayui tepsetba asoshi khukhua aitsür, ta Angami Public Organisation ajanga sangdong ka nung ashi.

Mejangjaba nisungi iba ama takum laluba ya yimjung nung aliba mechimententsütsü aser Naga nunger tsüngta rongrong adokdaksütsü asoshi tasü mait mapa inyakba lir, ta sangdong ajanga ashi.

(Maneni tapak 10 nung...)

Tensa den apet ainkar ola kakat sayaogo



Dimapur, Metsüremi/March 25 (TYO): Covid-19 anembong mapang Dr. Wati Longchari züluba kakat asemububa, Rev. Dr. Mar Atongchanger, Vice Master of the Serampore College Council-i tanü Serampore nung sayatsüogo aser Rev. Dr. Solomon Rongpi meshiteta sarasademtsü.

Iba kakat ya Laishir Tebu asür Dr. Renthly Keitzar sür küm 20 ajungba bilemteta aser

pai Naga nung tenük lapokja laishir takoktet aika adokdaksüba asoshi pa nem tenüngsang aser akhüm agüja züluba kakat ka ta tezüluri ashi. Iba kakat indang asen lenir Mrs. Bendanglai ashiba agi, "Ochi agi zükra kanga tashi asür. Ochimashi inyaker atema iba kakat ya kanga tako asütsü, saka ochimashi mapatemi kokdaksüra Naga lima aiatai tia ajurutsü. Ochi dangi meyiptsü mapang

tongogo. Iba kakat azünger ajaki ainkar ola adoktsü tenük lapokjang ta sarasademmer." "Kakat nung tuyuba ama Ao arogotemi anir inyak nungbo, Naga lima nung asentenshi aser temelenshi tulu bener arutsü." Iba kakat ya Discipleship Bible College and PTCA na longjemer adokba kakat pezübuba lir. Nungdakba puri DBC Principal Rev. S. Wati den tongteprateptsü mepishir (9612830935).

NEZCC-i NE nungi lanur 11 nem tetushi agütsü

Kohima, Metsüremi/March 25 (TYO): North East nungi art aser sobaliba luyim, lenla balala nung temaba jenjang nung takok anguba lanur 11 nem North East Zone Cultural Centre (NEZCC)-i tetushi agütsüogo.

Tetushi agütsürtem rongnung Assam, Manipur aser Nagaland nungi asemsem aser Arunachal Pradesh aser Meghalaya nungi kaka liasü.

Tetushi agizükertem rongnung Arunachal Pradesh nungi John Paleng (Folk aser sobaliba tsüngsang aser ken), Assam nungi Debajit Deka (Mime), Assam nungisa Rajashre Sarma aser Shivam

Saikia (Theatre), Manipur nungi Khumanthem Nganthoileima (tetsü tebou ken), Haobam Hemlata Devi (Theatre), Milan Laishram (Painting), Nagaland nungi Shavezo Keyho (Painting & Sculpture), Mhasiselhu Viyie (Sculpture), Meribeni Ngullie (Beads Making) nungerdensema liasü.

Nagaland Angh R N Ravi, shiba NEZCC mendenbuba lir, pai Raj Bhavan nung Bodhbar aonung Young Talented Artiste Award Ceremony agiba mapang takok angurtem nem tetushi sempet agüja liasü.

Sentong nung o jembiba mapang Ravi-i, NE nungi sempet tajung aketba lanur

artiste tem nem tenüngsang agütsü, aser parnok taküm aser career takok nung aotsü imlaja ataba lemsatop.

Ravi-isa, NEZCC aser linük nung tanga ZCC tem, India nung tetsü tebou sobaliba wazüka ayutsü aser linük sobaliba tali takarba kumdaksütsü atema bendanga agütsür inyakdar ta ashi. Sobaliba ya lokti aser nüburtem meraket lir, ta paisa shisem.

Iba sentong nung NEZCC Director Gouri Basu-a dena liasü, kong Lai Haraoba, Pung Chollom, Raas, Dhol Chollom aser Kabui Naga Dance nungeri sobaliba saya balala sayaogo.

Mokokchung nung Eat right campus sentong agi



Dimapur, Metsüremi/March 25 (TYO): Chief Medical Officer Office sangdong ka ajanga, March 25 nü Food Safety Mokokchung Zone-i achaayanga Eat right campus (FSSAI inyakyim) sentong ka IDSP Hall, IMDH, Mokokchung nung ayongzüka agiogo, ta metetdaksü

Iba sentong ya Watisenla Jamir, DCM lenisüba kübok agia liasü.

Eat right campus dak sendakba nung o jembiba mapang Dr. Ayangla Saku, DPO (UIP & RCH)-i, chiyongtsü shidak machiba (malnutrition)

ajanga lokti nung tanur tain ajak dak kongshir, aser Eat right campus movement ya nüburtem nem food safety aser nutrition indang tangazükba agütsütsü atema amenok ta ashi,

Sentong nungsa Nursing Tutor, School of Nursing Chubayangla-i, nutrition aser Health; nutrition agi anüngba, kumdangshia alitsü jenjangtem aser nutrition o health na tesendaktep indang PowerPoint presentation ka agütsü.

Kasa mapang nung Chemist, SPHC, Kohima Bendanglasenla Ao Longkumer-i, sentong nung shilem agirtem dang Food Safety

(FSSAI) indang inyakyim rasaa ashi. Laisa, chiyongtsü temenen, chiyongtsü shidak machiba ajanga timtem adokdaksüba indang jembiba aser Food safety ajanga nüburtem health tajungba kumdaksütsü nükjidong aliba indang lemsatop.

Maneni Food Safety Mokokchung Zone Designated Officer Merenlemba-i tepela anküp o jembiba sentong tembang. Sentong tembangba sülen Chemist, SPHC, Kohima Bendanglasenla Ao Longkumer-i anir Food Technician team kati chiyongtsü sample tem indang Lab demonstration ka sayu.

Kohima nung Local Examination Committee senden amen

Dimapur, Metsüremi/March 25 (TYO): Kohima district kübok Local Examination Committee pur senden ka Deputy Commissioner, Kohima indang Conference Hall nung March 24, 2021 nü mena liasü.

Committee indang mendenpuba aser Deputy Commissioner Kohima, Gregory Thejawelie menden sür iba senden amenba mapang tatidang agütsü aliba atema züngsemtem sensaksema liasü.

HSLC aser HSSLC Examination 2021 ya April 6, 2021 nungi April 29, 2021 tashi agütsü sentong lir, ta pai senden nung metetdaksü.

Paisa Kohima District kübok HSLC tatidang atema center 21

aser HSSLC tatidang atema centre 22 tashi amenokogo, ta ashi.

Taküm COVID-19 tashidak wara aliba mechi sorkari tatidang agütsü atema SOP sangdongba ama inyaksü aser social distancing yimyatam amshitsü mechi Kohima district nung kisüng masü, saka danga district aser sub-division ajunga nung examination centre talila amenok, ta DC Kohima ajanga ashi.

Paisa HSLC aser HSSLC tatidang tajungtiba nung agitettsü asoshi Committee züngsem ajak dang amalitep alitsü aser akok tashi nungita yaritsü ayongzüka aser examination centre tem nung tim masüba mapa meinyakdaksütsü asoshi tapet mera tem agütsü ayongzüka liasü.

Kiphire nung 'Violation of Human Rights' seminar agi



Dimapur, Metsüremi/March 25 (TYO): Kiphire District Legal Services Authority ajanga March 24, 2021 nü SP Kiphire indang Conference Hall nung anogo ka seminar ayongzüka agi. Iba seminar ya "Violation of Human Rights" omen nung ajemdaker agi, kong police tanishir, O.C Women Police densema police ajak senteper 65 shi arua dena liasü.

Dr. Purna Chandra Mishra, Officiating Principal, Zisaji Presidency College Kiphire ajanga "Violation of Human Rights" onük nung ajemdaker jembiba mapang, khen-khen bo police temi tai tonglokja alir temang aser tekolok nung timtem agütsüba ya talila aor aser timtem jenti ajurur, ta ashi.

Police kabu nung nisung asüba ka küm shia timba akumer. Aser ibaji ajanga meimchir temeden nung aibelenba sayur. Anungji tai tonglokja alirtem police kabu nung lia kanga kumdanga amshitsüla, ta pai ashi.

Right to education aser gender discrimination, right to property, right to equal opportunity for employment aser right to get wage for equal work nung aibelenba tem tejangja shia angutsü, ta pai ashi.

Kunyangli Sangtam P/ Lawyer DLSA, Kiphire ajanga "Rights of arrested person" onük nung jembiba aser sentong nung adener dang CrPC indang Section 50 (2) rateta shia liasü.

73 buba Yimchungru Tribal Council lokti senden menogo

Dimapur, Metsüremi/March 25 (TYO): Pungro sub-division kübok Iponger yimtsüng nung March 24, 2021 nü 73 buba Yimchungru Tribal Council indang lokti senden "Patriotism and Peace" omen nung ajemdaker mena liasü.

Iba sentong nung tetushi tesemdanger, Advisor, IPR, SCERT & VG, Toshi Wungtung ajanga ENPO tir aser YTC tir matsüngdang Yimchunger Tribal Council indang nüngshilong sayatsü.

Wungtung-i Kiphire district

kübok iba senden nung adeni aruba kin lenirtem aser Administration den salem o lematepa lokti ayongzüka liasü.

Iba sentong nung Cultural Group Longtsungru village, Zaonger village, Zhimkiur cultural Troupe aser Tribal squad, Pungro Village nungertemi sobaliba ken dena tsüngsang sayua liasü.

Iba sentong nung YTC tatong tir, Kiuji menden liasü aser YTC tongti zülur Laji Luyanba-i tepela ankep o jembiba liasü.

Kohima atema water supply project ka commission asütsü

Dimapur, Metsüremi/March 25 (TYO): Department of Public Health Engineering ajanga Kohima jila atema water supply project ka March 26, 2021 anepdang 11:00 nung commission asütsü. Iba atema tzü ya Mima yimtsüng kübok

Zari ayong nung aliba Water treatment Plant site nungi atsütsü. Iba sentong nung Chief Minister, Neiphiu Rio tesemdanger tongti asütsü aser Minister PHED, Jacob Zhimomi ya sentong ayonger ka ama adentsü.



March 25, 2021 : Assam assembly election mezüngbuba phase magi tsünga election duty atema mapa lemozüker aliba gari anishirtemi pei tata polling booth-i mao tsünga Dibrugarh nung tenügdakba kuli kakettem agizükba noksa nung angur.

Piles Anepaluba - Kabiraj dang alakteta pelaba metetdaksür. Piles, Fistullah, Gastric, Sinus aser Tonsil-Ajma agi ni kangshia liasü aser Rectum nungi azü alu dang mapang talangka item timtem nungi junga taneptsü mang. Ajisüaka, tang **Kabiraj H. Umar Chesam contact no. 9362359056 / 7627998690 Address: Burma Camp Police point opp.** tetuyuba nung anidaka surgery kecha magii (non-surgical) anepalur anogo ishika tsünga ni taneptsü ngua liasü aser iba sülen tanü tashi kü temang nung timtem kecha mali.

Time: 9 AM - 5 PM -Yours sincerely - Xukikse, Add: DC Court, Dimapur

BJP-i CAA anema nokdakba aitokatokner: Assam Congress

Guwahati, Metsüremi/ March 25 (Agencies): Assam nung taoba küm pongu tsünga sorkar anema longkak aiterem maliasü ta Union Home Minister Amit Shah-i ashiba Assam Congress aitsüogo.

Assam Congress-i ashiba agi, Amit Shah-i Assam nung Citizenship Amendment Act anema nüburtem apusoba züba züba dang aitokatoktsüner.

"Pai Sonowal police force-i prangbong agi akhanba mapang taküm samara Sam Stafford o Dipanjol nunger amala asangur chanutem taküm indang mesükshiner," ta Assam Congress-isa ashi,

"Assam nung aliba nüburtem atema iba dak alia tanga takoksa tuluba kechi ali? CAA anema nokdakba mapang taküm bendanga agütsür kinungertem semdangtsü asoshi BJP lenirtem mapang maliasü aser parnoki süoki ia mali," ta parnokisa ashi.

CAA dak sendakba nung BJP party mangmangteper, ta Congress-i ashi.

"CAA indang BJP-i mapa talangka jembia aruogo saka Assam nung BJP lenirtemi kecha ola madokba ajanga parnok kanga mangmangtepbba kuli agütsür."

"CAA ken o ajanga BJP party ana küma lemdanger aliba sayur," ta Assam Congress-i ashi.

"PM Modi-i West Bengal nung Purulia semdangba mapang CAA benoktsüba indang jembio, ajisüaka Assam kübok Jorhat semdangba mapang pai kechiba CAA indang ojang ka danga mejembi. Pa kechi tsübur? Assam nung CAA benoktsü indang jembiba ajanga nüburtemi state nung BJP atsüngtoktsü tsübur asü." ta Congress lenir Gaurav Vallabh-i Guwahati nung ashi.

Linük ajunga nung BJP-i kecha minyakba aija, Chhattisgarh Chief Minister Bhupesh Baghel-i, saffron party-i lokti lemdangtsüba den tetsübu aitdakja vote angutsü meranger, ta ashi.

"BJP-i telem dang adokdaksütsü merangba den tetsübu aitdakja vote angutsü meranger," ta Bhupesh Baghel-i Brehostibarnü Guwahati nung osangbenertem den sensaksemba mapang ashi.

Arunachal Pradesh nung 'tourist circuits' tali amenoktsü

Guwahati, Metsüremi/ March 25 (Agencies): State kübok District balala nung tourist circuits atema lenmang mesapoktsütsü asoshi Arunachal Pradesh sorkari kanga temulung agüja tang aliba police station tem yanglushiba den ki tasen süyonga odar.

Arunachal chief minister Pema Khandu-i Brehostibarnü Changlang district nung Miao Police Station semzüktsüogo.

Paisa, tawa Changlang, Namtok, Jairampur, Nampong aser Manmao nung police station ki 5 semzüktsüogo. Tirap, Changlang aser Longding district tem nung police stateion 21 shi yanglushiba den tasen amenokogo. Iba ajanga item tesemtem nung temzüng ozüng tajungba benoka inyaksangshitsü aser iba ajanga tesem ajunga renlokyonga aotsü," ta Khandu-i tweet asü.

circuits atema takaratiba nung lenmang mesapoktsütsü atema police station tasen amenokogo," ta Pema Khandu-i sentong nung o jembiba mapang ashi.

"Item District tem nung tourism sector renlokba ajanga lanurtem mapa balala nung amoka inyaksü asoshi lenmang aika lapoktsütsü," ta pai ashi.

"Changlang, Namtok, Jairampur, Nampong aser Manmao nung police station ki 5 semzüktsüogo. Tirap, Changlang aser Longding district tem nung police stateion 21 shi yanglushiba den tasen amenokogo. Iba ajanga item tesemtem nung temzüng ozüng tajungba benoka inyaksangshitsü aser iba ajanga tesem ajunga renlokyonga aotsü," ta Khandu-i tweet asü.

CPI(M) MLA temi Tripura forest minister aitsü

Agartala, Metsüremi/March 25 (Agencies): CPI(M) MLA temi, ozüng alema ali atsünga ochi mashi ken o nung Tripura environment and forest minister Mevar Kumar Jamatia densema lir ta shia pa aitsü.

Mevar Kumar Jamatia ya IPFT general secretary lir aser pa Khowai district kübok Asharambarai constituency nungi lir.

Tripura sorkar kübok IPFT ya BJP den lokteper lir.

CPI(M) MLA temi iba ken o ya state assembly nung benok, aser ali ochi mashi ken o nung forest minister densema aliba bushitsüngdangtsü akhang.

Jamatia anema taitzüba aika akümba sülen assembly nung jembishinü khen atema anena ata.

Parnoki ashiba agi, Jamatia-i forest department kübok sorkar ali tulu ka ozüng alema atsüng.

MLA temi assembly nung Tripura chief minister Biplab Kumar Deb dang iba ken o dak sendakba nung telangzüba ka agütsütsü akhang.

Kasa mapang nung Jamatia-i, ali ochi mashi ken o nung pa densema aliba kari danga kuli bener arutetra pai cabinet menden toktsütsü ta ashi.

Tatamsa Tripura Legislative Assembly speaker Rebati Mohan Das-i assembly minute ter atema anendakja ata.

CPI(M) MLA Badal Choudhury-i, "Forest Rights Act kübok arem ali ya sensak tia nung aliba tribal kibongtem atema lir, shirnok ket nung ali aser tanen makai senotsü aadak mali. Mevar Jamatia-i iba ozüng amshia Khowai district nung arem ali akhang," ta ashi.

Choudhury-i ashiba agi, Khowai district magistrate-i revenue office dangi shiti ka yokogo, kong temzüng ozüng tapet dak ajemdaker ali ya minister nem agütsütsüla ta shia lir.

"Iba ali agütsü Jamatia temsüa mali kechiyong pa ali maka masü. Pa kinungtsü ya sorkar tenzüker ka lir. Minister nem ali agütsüba inyakyim ya tim masü," ta pai ashi.

Maneni CPIM MLA Tapan Chakraborty-i, "minister ka ochi mashi ken o nung densema mepetmesü aiba ya cabinet ajunga atema maksü lir. Iba ken o jangjatsü atema chief minister-i ken o bushitsüngdangtsü tuyutsüla," ta ashi.

Meghalaya: 2025 küm tashi nungbo TB samatsütsü sentong yanglu

Shillong, Metsüremi/March 25 (Agencies): Meghalaya Health and Family Welfare Minister AL Hek-i Bodhbarnü, 2025 küm tashi nungbo Tuberculosis samatsütsü atema Meghalaya State Strategic Plan amenokogo.

"Tuberculosis-free state kümdaksütsü nükla ayuba kübok incidence rate dak sendakba nung TB burden 44/ lakh, mortality rate 3/lakh agi tajemba kümdaksütsü aser 2025 küm tashi nungbo tuberculosis ajanga timtem bener arutsüba tajemba kümdaksütsü," ta pai ashi.

Revised National Tuberculosis Control Programme (RNTCP) ya state nung 2003 küm October 2 nü amenok.

Taoba küm ter tsünga iba sentong kübok TB tashidak keta alitsü ta bilemertem 4,74,767 tendangogo, iba den nisung 76,485 temang anepalutsü aser shiranger 63,789 takok ngua anepalutetogo. RNTCP takok jenjangji shilem 83 lir.

Paisa, state aser linük ajunga nung tuberculosis ya health tsütsü tebilemtsü tulu ka lir, ta ashi.

Minister-i, Ato Kilonser Narendra Modi-i 2018 küm 2025 küm tashi nung TB samatsütsü nangzükba lephsia jembi.

"Iba nükjidong atongtsü küm pezü dang anunga aliba mapang onok mapang arir. Ni stakeholders, development partners, lokti tentet balala, bushitsüngdangba institutions, private sector aser TB samatsütsü asoshi inyakba maparen nung sendaka alirtem dang iba sentong asoshi takokba tashi tajungtiba agütsütsü mepeshir," ta pai ashi.

Minister-isa, state nung aliba nüburtem dang iba sentong nongita yaritsü ayongzük. "Tuberculosis anema rara nung lokti-i shilem agiba ajanga takok angutsü," ta pai ashi.

Correct PIN Code Means Perfect Delivery

With India Post, get the right PIN code for your destination

OFFICE OF THE POSTMASTER GENERAL
NE - II REGION, DIMAPUR - 797112

For more details: Visit the nearest Post office or log on to www.indiapost.gov.in

DigitalDost IndiaPost



TIR YIMYIM YIMOBILEM (EDITORIAL)

DIMAPUR ROGONÜ, METSÜREMI (MARCH) 26, 2021

Tebilemtsü taila

Asen lima nung nübortem nüngdak peria bushia agütsüttsüsa kaketshisatsü shitak mangur; yimten tebilemtsü aliba agi peisasa meranga inyaka rongsen züsentettsüba nunga timtem ajurur; mapabo inyaker meinyakma lir saka tenzüka meinyaktetba agi mapa manguba tebilemtsü agi shisabolupter; angati taneptsü angudak makaba agi takaba ajak yoktemer sendem agia taküm atemer aser lanurtem aika mozümora achiba aser moiijing külemba agi kibong, lokti aser arogo kanga mesüngjemteti kümogo. Itemji tanü asenoki asen lima nung anogo shia ajuruba tebilemtsütem lir. Atangji, item tebilemtsütem ya asenoki küm ishika jakdang asen lima aser nübortem meima temulung agüja inyak nungbo ajungtsüba ser nung, asenok ajak pei pei agitsü aser akatsü dang bilema aritepdang, asenok dang masü saka lanu putu aika akoksadaksüdag. Item tebilemtsütem ya, jungjunga bilemdangra, mekoktettsüba akümlir tebilemtsü masü saka asenok morumoruba, azümasenba aser nukla makaba agi maongka aser temoatsütem agi tebilemtsü kümdaksüba taila tebilemtsütem lir. Ano, item tebilemtsütemji yutsür, tanü Nagaland nung nübortem ajuruba tebilemtsütem madak tebilemtsütem rongnung kaji, government mapa nung inyaktertemi pei tenzüksüba tesem nung lia nübortem yaritsü mejangraba aser nüchiso bushirtem telok zünger mezüngmai nübortem asoshi inyakba mapatem nung saru agiba ya asütsü. Aji oda, kar mapai maor aser kari saru sarur ta asüdagji, anepalur-a mali aser tzü agia meperir ta asüba agi naronü südaksüba ama, nisung ajak senso tajung kuma pei lima meraketa yangertettsüba agi asen lima kanga raksadagi. Tanga osangtem ajakji yutsür, yashiang Kiphire district nung tenteta aliba lokti tentetemi government mapa nung shirnoksa Kiphire nung lia nübortem tenzüksü asoshi yoka ali, parnok jagi tangar memenepi aliba lima, tsüket nung tenzüksübaji temerenshi ama masü saka nübor tenzüksü atema maongka anguba ama bilema tenzüksü asoshi mapa inyadkak lia tenzükan ta ashibaji ajak atema tangatettsü, teinyaktsü aser tayongzükbata tulu asütsü. Ano, Kiphire nung alirtemisa Naga nung nüchiso bushir teloktem dang, parnok district nung terenlok mapa inyakba mapatem nung saru memeshitsü aser jangotsü aser osettsüset nung jenjang atutsüsa tangalen nungi dokan khu bener aruba nunga saru magitsüla ta metetdaksüba nungji, rasaa mashiyonga, tanü par lima nung parnoki ajuruba tebilemtsütemji angur. Atangji, item tebilemtsütemji Kiphire nung dang masü saka Nagaland ajaklen ajaki ajuruba tebilemtsütem lir. Item tebilemtsütem ya Tsüngremi asenok memeimba agi yokba tebilemtsütem masü mesüra moiijingi asenok timtemdaksütsü asoshi yokba tebilemtsütema masü saka asenoksasa asenok timatemtsü aser akoksatsü yangluba taila tebilemtsütem lir. Alima nung shirangba aser tsüngsang mopong majungba agi ayawara aruba aser yipru mopong, menoknok aser tzümetsüng agi timtem takoksa ajurubatem ya alima yimya ta ashitsü akok, saka tanü asen lima nung government tenzükertemi nübortem meyarinüba ajanga nübortem akoksadaksüba aser linük tenzükertemi saru saruba agi mapa junga meinyaktetba tebilemtsütem yabo alima yimya tebilemtsütem masü saka taila tebilemtsütem lir. Item tebilemtsütem koktetra, idangjisa Nagaland jungadoktsü. Iba tangatetba aser teimla nung, joko, asenok ajak ojang seplepdi aser nübortem tenzükbata mapaji Tsüngrem külemba mapa ama bilema inyakdi. Iba kasa tangatetba nung nüchiso bushirtema saru saruba ajanga nübortem den tesendaktep meraksatsüsa sentong tasen yanglua Naga yimten tebilemtsü ya tatembang kuma koktettsü merangtsüla. Iba jagi dang tanü asenoki ajuruba taila tebilemtsütem ya koktettsü aser asenok ajak asen lima nung meraketsketa pei metetba aser pei jangraba aser pei akok mapa inyaka alitsü.

OLEMSABANG

TENSA DEN PETA CHUBATEM KAKET AZÜNGBA

~ Dr. Temsüyanger, CTC, Aolijen

(Yashi adok nungi...)

Tanü tensa nung Naga nung dang kechi ashir?

Solomon mapang lokti tentet aser pa mapatem shisadangra, Solomon yimsüsüba tongtibangtiba sendongji ya liasü - linük tejakleni aotsü (development) mechi pai rongsen benden. Rongsensüba nung linük aintsü mechi pai rongsen benden. Ibaji dang masü, pa yimli nung ki aika yanglutsü asoshi pai rongsen benden, aser nübu tashiyim agi benden. Solomon sendong ajanga par lokti nung yimsüsürtem, rongsensüba nung takartem, aser lokti nung lenirtem telok ka adok, iba telok ket nung linük rongsen aser tashi ajunga ama liasü. Saka ano külenbo pei nüburtem jenti teküpoktiba jenjang nung aliba teloka liasü. Anungji, rongsen akaba aser yimden-yimli tashi amshiba nung telok ana kenyongi telemdang liasü. Yamaji kodang Israel tejen loktiliba aser sobaliba nungi chuba yimli loktiliba aser inyakyim agi melen, nüburtem rongnung ochimashi agi sünga liasü, nüchi agi anünga liasü, temeim aser temeshiba agi anünga liasü, tashi toktepba agi sünga liasü. Anungji ochi aser nüchi noktangba anema ainkar aser nüburtemi noktakba asenoki otsü nung angur.

Solomon mapang ama Naga nung otsü nung, tejen putu loktiliba aser sobaliba nungi tanü tensa loktiliba aser sobaliba tasen agi libaliro aser inyakyim aika nung melenogo. Hau, tanü putu sobaliba tasen aser shisaliok ajanga Naga nung lemang aika nung tajangzükbata ngua tejakleni odaki, saka ano kodang külen asen taküm libaliro, loktiliba inyakyim aser temeshiba taküm indang shisadangdir, asen taküm mashileni aoba aser mejungi raksaba aika dang kümogo. Talisa tanü rongsensübaren aser inyakyim aser tangatetba tasen (economic globalization) ajanga Naga nung taküm aser lokti aika tia maka raksatsüdaki. Anungji, loktiliba taküm aser kija taküm nung nüchi aser temeshiba asoshi nokdaksü aser inyaktsü asoshi Khristar arogo ka tenyaba mapa kanga rongdaka kümogo. Ainkar Ahijah aser Yeroboami anir nüburtemi ochi asoshi, aser tashiyim anema noktakba ama, tanü Naga nung Khristantem aser arogotem-i tanü asen yimden-yimli aser loktiliba balala nung ochi samaba aser tashiyim mapa anema nokdaksüla, aji süra, chichiba nüchi aser temeshiba takümüji Naga nung kija taküm aser loktiliba nung ajurutsü.

Tsüngremi alima chuba aser alima yimsüsürtemi inyakba mesüra inyaktsü matar, saka kodang tajemzükbata tia nung aliba nüburtemi ayimtener, idangji Tsüngremi pa mapa inyaker. Duchrow-i ashir, kodang nüburtemi tamangba nung, loktiliba nung, yimden-yimli nung, rongsen ketdangsüba nung, yimsüsüba nung, tashiyim kechi agi nüburtem alar kümdaksü aser telongjem raksadaksü aser kodang nüburtemi item temenentem den raratsü noktakdir aser raradir idangji dang Tsüngremi Pa nüchiso agütsür. Ibai Naga nüburtem aser Khristantem asoshi tamang tamendakdak aser ajok asütsüla.

Naga nung Khristar arogo tenyaba tajaba kar:

1. Economic globalization ajanga meimchir telok aika tajemrepba tia nung yuja lir. Ibai koda tamangba aser loktiliba balala asoshi khuret, aji nüburtem dang angatetdaksütsüla.
2. Asen tensa nung tajemrepba jenjang nung alirtem tia nungi Laishiba azüngtsüla. Khristar arogoi aser arogo nung tajemrepba jenjang nung aliba nüburtem asoshi nüchi mangdang tajung alitsüla.
3. Khristar arogoi tanü asen tensa nung azü tokshiba, kin-kidong meputepba khuret, yimsüsüba nung ochimashi, rongsen ketdangsüba nung ochimashi, loktiliba nung tashiyim tebilemtsütem, item ajunga nung koda meimchir asoshi Tsüngremer nüchi aser ochi asoshi noktaker, aji angatetta tenyaba mapa inyaktsüla.
4. Shirnok tajemzükbata tia nung lir; aluyimertem, yimtsüng nung alirtem, tetsür aser tanurtem, shirnok loktiliba balalai songtema yuja lir, item nübur teloktem nem koda teimla agütsütsü, aji nükjidong asütsüla.
5. Arogoi nüburtem shinoki tashiyim anema nokdaker, shirnoki nüchi aser ochi asoshi noktaker, parnok nem tashi agütsür tongti ka asütsüla.
6. Arogoi nüburtem teimla aser taginübatem metettsüla, aser itemji atangji nung kadaksütsü asoshi maneni inyaktsüla.
7. Asen Khristan tamangba aser alimar yimten yimli tesendaktep arogoi metettsüla.
8. Arogoi talisa alima rangben shirangba tangatetba, aser alima rangben alangzüksü Khristan tamang tesayuba nung tongtibang agütsütsüla.
9. Laishiba koda aseni tanü tensa nung ajangashibatam nungi azüngtsü, ibai bushitettsü kanga asen tribal pur asoshi tongtibang ka lir.
10. Asen tribal sobaliba nung ajak kasa aser liromedema alitsü tanela aser lokti meimba tanela, item sobaliba tajung bona arutsüla. Alima ajunga meimba libaliro aser tzü, mopung aser ali den sendaktepba litetba sobaliba, alima ajunga temeshi ta tangatetba tanela, item tangatetbatem aser libaliro nüburtem taküm nung mapa kuma inyaktettsü aser litettsü sayutsüla.

- Yimozülur dangi-

Ao Oshi Angazükdak

Tawa-tanü nungi Tir Yimiyim ajanga anogoshi Ao Oshi Ojang ana-ase adokba angur. Ibai tongtibangsa Aor lanurtem shirnoki bendanglima nung soa-intetertem lir, parnok asoshi teyari tulu asütsü. Anungji item ojangji kanga junga angazüktsüla. Aser bendena ayutsü; kechaiser aji na aser tangar aika asoshi Ao Oshi Oseb (Ao Dictionary) tajung ka asütsü.

Rev. S.Temjen Lkr.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

OLONG PAITEP # 5764

1		2						3		
		4		5			6			7
8							9			
10		11				12				
13						14			15	
16						17				
								18		

TIPILEN

1. Ulu masü - (3)
 4. Tanang masü - (4)
 6. Ishika - (4)
 8. Tebang nung shilem ka - (6)
 9. Poktet - (4)
 11. Oset-tsüset ayutsü asoshi yangluba - (7)
 13. Kilong masü - (4)
 14. Sents_ _ _ _ _ hi - (6)
 16. Tzü tatsük agi yiru - (4)
 17. An _ _ _ _ _ len - (4)
 18. _ _ _ aruli - (3)

LANGTSÜNGLEN

2. Ali nung songok - (4)
 3. Tamendak - (6)
 5. Ki yongsük - (5)
 7. Osang tamajung angashidang - (5)
 10. Ana küma sangma - (5)
 11. Tenungsang asoshi agütsüba - (6)
 12. Tenungsang ken zülusang - (5)
 15. Sü _ _ _ _ ng - (4)

OLONG PAITEP # 5763 TELANGZÜBA**TIPILEN :**

2. Anatsü, 6. Nüji, 7. Aputak,
 9. Lula, 10. Lenir, 11. Apen,
 14. Langzü, 16. Aket, 17. Süsang.

LANGTSÜNGLEN :

1. Pokpu, 2. Akat, 3. Atak, 4. Senyur,
 5. Mit, 8. Asen, 9. Liwa, 10. Leptsü,
 12. Azüok, 13. Nao, 14. Lasa, 15. Nüng.



- Tamanger : Hai Adianu, tanü asüng revival mapang lir, anungji nera koma renema lir, Ni ner atema sarasademtsüdi koda ?
 Kinungbo : Kidangi atua menangkodo!
 Tamanger : Süra sarasadem nung abentsü khuret lir mali ?
 Kinungtsü : Aika lir, saka ka dang shidi, ozü jala ya takar tulur ka Kii yokner, Saka kechi agi alena aliar memeteter aji atema bendakjangma.
 Tamanger : Ni sarasademdino, O Kibuba Iba jala ya kechi talenba agi alener takar tolur Kii moteter ni talenba ajunga salatsür, naia talenba salajang ta ozüng agüjangma Amen!
 Tebu : Jala Narolabo Amen asüandangbo kongi oadok ?
 Narola : Oba, Iba nisung yagi kü temang nung aliba talenba süngzü ajunga amoshia salatsüogo, anungji ni roomi jena! yiatok
 Tebu : Yabo????

Lilir: I. King Ajem, Indisen, Dimapur.

TANÜBO NAI LANGZÜANG

Q. 66buba National Film Awards nung film koba ajanga National Award 4 takok angu?

- A. Uri: The Surgical Strike B. Wild Karnataka
 C. Rahas D. None

===== (Taruba adok nung onoki langzütsü)

YASHI ADOK TELANGZÜBA : Film Finance Corporation.

AO OSHI ANGAZÜKDAK:

TANÜ ANGAZÜKTSÜBA OJANG

Alen

- (v) Süngzü mesüra yong agi ka küma arakba (tie)
 * Sepaitemi auersang teka pereptepa alen.

Alen

- (v) Pu agi süng laodaktsüba (cut down tree with axe)
 * Aluchirtemi pu agi süng tulu ajak alen.



Tir Yimym

NAI-A YA METETTER MA?**MARCH 26 NÜ ASOR TONGTIBANG NISUNG KAR:**

- Poet Robert Frost (1874)
- Fashion designer Guccio Gucci (1881)
- Mythologist/writer Joseph Campbell (1904)
- Playwright Tennessee Williams (1911)
- U.S. Army Gen. William Westmoreland (1914)
- French composer/conductor Pierre Boulez (1925)
- Actor Leonard Nimoy (1931)
- Actor Alan Arkin (1934)
- Actor James Caan (1940)
- Author Erica Jong (1942)
- Singer Diana Ross (1944)
- Singer/musician Steven Tyler (1948)
- Actor Vicki Lawrence (1949)
- TV personality Leeza Gibbons (1957)
- Actor Jennifer Grey (1960)
- Country singer Kenny Chesney (1968)
- Actor Keira Knightley (1985)
- Actor Prakash Raj (1965)

SUDOKU # 5806

1	9	4	6			5	2	
6				1				
3	2	7	5	8		6	9	
9		3	7	5		8		
7			2			9		
		2			9	7		
2			8		7		5	3
5	3					4		
8	7	1		3		2		9

TELANGZÜBA # 5805

1	6	8	4	5	7	9	3	2
7	5	9	1	3	2	8	4	6
2	4	3	6	8	9	1	7	5
5	3	6	8	7	1	4	2	9
9	7	2	5	4	3	6	1	8
8	1	4	2	9	6	3	5	7
3	8	5	9	2	4	7	6	1
6	2	7	3	1	8	5	9	4
4	9	1	7	6	5	2	8	3

OJANG LUTEP # 5350

DKOAANG	:							
TALOANKMADGI	:							
IAALB	:							
NTAKDAALOG	:							
AJIIB	:							
UANG	:							
EHIMCRM	:							
NJUGAA	:							
ÜNGMSAANG	:							
KSATPAOEER	:							

OJANG LUTEP TELANGZÜBA # 5349

ASENOKI MANGATETER DANG ASHI TSÜNGREMIBO
ASENOK MEIMCHIR AJAK KANGA MEIMER

TAN HOPTA ATEMA - KOMA SÜLA ?

Q. JCPI teloki akangba ama tangsa tang 1963 küm 1st December nung ajemdaker, Nagaland Senso Register (Register of Indigenous Inhabitants of Nagaland) ka lapoka Nagaland sensosanger tenüng zülüok tenzük nunga koma süla ?

Olong 20 shi nung March 26, 2021 tashi nung iba telangzüba ya onok dangi (e-mail - tiryimyim@gmail.com) :
 (SMS - 9856121232 / 9436072422) : (WhatsApp - 7005723372 / 8729995804) : (tiryimyim.in) ajanga yokang. Telangzübatemji taruba Honibarnü adoktsütsü.



Palakkad (Kerala), March 25, 2021: Brihostibarnü Palakkad nung District Collector, Mrinmayi Joshi-i 'election-mass run' tenzüksüba noksa nung angur. Iba sentong ya SWEEP-i Victoria College ground nung ayongzüka liasü.

Parliament House anaprongla nung Budget senden tembangogo

New Delhi, Metsüremi/ March 25 (Agencies): State pezü aser Union Territory ka nung assembly election tenzüksü anogo ana dang lia Brihostibarnü Rajya Sabha aser Lok Sabha naprongla nung Budget senden tembangogo.

Budget senden tanabuba shilem ya March 8, 2021 nü tenzük aser April 8 nü ang tembangsü sentong liasü saka tekaraba tembanger.

Assembly elections agitsü aliba nung ajemdaker party balala nungi MP temi Parliamentary Affairs Minister Prahlad Joshi, Lok Sabha Speaker Om Birla aser Rajya Sabha Chairman, M Venkaiah Naidu nunger dang senden tembangsü asüngdanga liasü.

Trinamool Congress

lenirtem- Sudip Bandyopadhyay aser Derek O'Brien natia shidi balala ajanga Lok Sabha Speaker aser Rajya Sabha Chairman dang senden tembangsü mepishia liasü.

Budget senden nung Rajya Sabha nung Bill 19 agizük, aser item rongnung Major Port Authorities Bill, 2020, Medical Termination of Pregnancy (Amendment) Bill, 2020, Insurance (Amendment) Bill, 2021 aser National Bank for Financing Infrastructure & Development Bill, 2021 densema lir.

Lok Sabha nunga Bill 18 agizük aser item rongnung Arbitration and Conciliation (Amendment) Bill 2021, Mines and Minerals (Development and Regulation) Amendment Bill,

Constitution (Scheduled Castes) Order (Amendment) Bill, 2021, Insurance (Amendment) Bill, 2021, National Capital Territory of Delhi (Amendment) Bill 2021, Marine Aids to Navigation Bill, 2021, National Bank for Financing Infrastructure and Development Bill, 2021, Finance Bill 2021 aser Juvenile Justice (Care & Protection of Children) Amendment Bill 2021 densema lir.

Budget senden mezüngbuba shilembo February 29 nü tembanga liasü.

Tamil Nadu, West Bengal, Kerala, Assam aser Puducherry nung March 27 nungi tenzüka April 29 tashi assembly election agitsü aser May 2 nü election osang sangdongtsü.

India nung ano nisung 53,476 dak Covid putet

New Delhi, Metsüremi/ March 25 (Agencies): Tesüiba ghonda 24 tsüngda India nung ano nisung 53,476 dak coronavirus tashidak putetogo; aser ibai taküm küm tenzüker anogo ka kija nung nisung timtiba dak iba tashidak putetba lir.

Linük nung nisung ajak agi 1,17,87,534 dak coronavirus putetogo, ta Brihostibarnü

Union Health Ministry-i metetdaksü.

Tesüiba anogo 15 tashi India nung nisung aika dak iba tashidak puteta arudar; tang iba tashidak agi teshirangdakpur 3,95,192 lir, aser iba tashidak agi anepba shilem tajemba küma shilem 95.28 dang kümogo, ta kasa osang ajanga metetdaksü.

March 23 tashi nung linük nung coronavirus vaccine dose

crore 5 agütsüogo.

India nung Covid-19 vaccination ya taküm January 16 nü tenzüka healthcare workers nem tama vaccine agütsü, iba sülen February 2 nungi frontline workers nem agütsü. Iba sülen March 1 nungi arrshi küm 60 ser temapurtem aser comorbid alir arrshi küm 45 ser temapurtem nem vaccine agütsü tenzüka liasü.



Srinagar, March 25, 2021: Brihostibarnü Srinagar yimti tezülen Lawaypora nung telungpurtemi CRPF sepaitem amakba tesem nung azü yimshia aliba noksa nung angur. Iba lendong nung CRPF ka asü aser asem yiru.

Aluyimer unions-i March 26 nü 'Bharat Bandh' nungittsü mepishir

New Delhi, March 25 (Agencies): Aluyimertem unions-i tentetba Samyukta Kisan Morcha (SKM)-i linük nung sensotem dang aluyimertemi aluyimba ozüng tasen asem anema longkak aita March 26 nü ayongzükbba 'Bharat Bandh' takok angutsü atema shilem agidaksüner, ta mepishi.

SKM-i sangdong ka ajanga, aluyimertemi tesüiba ita pezü tashi takhangba agütsüyonga sorkari magizüker, ta metetdaksü.

Aluyimertemi Hokolbarnep 6:00 ako nungi nikongdang 6:00 ako tashi linük tesem ajak mokdangtsü; iba mapang nungji election agiba tesemtem dak alaka linük tesem ajungalen road & rail transport mesenzütsü, markets aser public tesem ajak shibangtsü, ta SKM-i metetdaksü.

Taruba hopta ana tsüngda aluyimertemi alu nung wheat tsük aruhtsü lia aluyimertemi March 26 nü linük tesem ajak mokdangar.

Ganganagar Kisan Samiti nungi lenir Ranjit Raju-i, yaküm aluyimertem Delhi arrtsülen adenshia longkak ait tenzükba sülen March 26 nü ita pezü ajunger, iba anogo nung dokan aser shishilembaba tesem ajak ghonda 12 shibangtsü, ta metetdaksü.

Paisa, March 28 nüa Holi benjung nung aluyimertemi longkak aita sorkari benokba aluyimba ozüng tasen asem kakettem rongdoktsü, ta metetdaksü.

Bharatiya Kisan Union (BKU) Tir, Rakesh Tikait-i, "Parnoki (Centre) kin aser tamangba yimsü nung ajemdaker aluyimertem tsüngda telemsa adokdaksütsü merang, saka tamakok angu," ta ashi. Centre sorkar aija pai, "Aluyimertemi tesem mashie nung aonsotsü yoktetttsü ta Ato kilonser Modi-i jembiogo, anungji aluyimertemi State Assemblies, Collectors' offices aser Parliament nung aonsotsü ayoktsü. Parliament ama market tajungba mali," ta ashi.

BJP-i Election Commission inyakyim nung jangjonger: Mamata



Danton (West Bengal), March 25 (Agencies): Brihostibarnü Trinamool Congress (TMC) tongti lenir aser West Bengal Chief Minister, Mamata Banerjee-i, BJP-i Election Commission inyakyim nung jangjonger, ta aitsü.

Tesüiba anogo ishika tsüngda Election Commission-i sorkar ketdangser aika tesem balalai transfer yokba anema Chief Minister-i ola adok.

Brihostibarnü Danton nung assembly election atema nüboyim sentong ka nung jembidang Mamata-i, "BJP-i Election Commission inyakyim nung jangjongba apibo Election Commission ya BJP commission ka amai lir," ta ashi.

La helicopter nung mener Sagar asetkong nungi Danton tashi aoba mapang nung sorkar ketdangsertem transfer yokba osang lai angashi, ta shia lai, "Nenoki (EC) ketdangsertem ajak transfer yoker. Ibaji ajanga onoki takok angutsü aliba menokdangtetttsü, kechiyong nüburtem onok den lir," ta ashi.

"Ni Election Commission kanga akhümtsübur, ajisüaka kechiba Lok Sabha election aser assembly elections mapang nung police ya Centre küboki aitdaksür. Kechiba EC kübok masü?, ta ni election

ketdangsertem dang asüngdangar," ta lai ashi.

Election Commission-i lai aniba sorkar dang rabbitsüri benshiba ama benshir ta shia lai, election commission-i la nem show cause notice agütsütetttsü asü?, ta asüngdang.

"Nenoki (EC) kü dangi shidi 10 dak tema yoktsüa akok, saka ni shisa mebulur," ta lai ashi.

"Kechiba BJP-i tuyuba ajak angar. Ketdangsertem agentsü atema BJP-i inyaker aser idangyongjisa EC-i tashi angar. EC-i teinyaktsü tim meinyaker," ta lai ashi.


"Onok ya regional party ka lir. Tanga regional party aika lir. Onok ama regional party samatsütetttsü, ta nenoki bilema lira ibaji tai," ta Mamata-i ashi.

"BJP-i iba asaya nung tamakok nguogo, ibayongji ketdangsertem melentsü meranger. Ketdangsertemi vote magütsür saka nüburtemi dang vote agütsür," ta lai ashi.

Mamata Banerjee-isa nüburtem dang, votes auyatsü atema kidanger state- Odisha nungi nisung anir aruba mita reprangtsüla, ta ashi.

"Sen lema agütsüba Party ka nem vote agütsüdaksütsü atema Odisha nungi nisungtem anir aruba osang ni angashiogo," ta laisa metetdaksü.

Rohingya refugee temi azüki tanaben yanglur



Cox's Bazar district, Bangladesh kübok Ukhiya nung aliba Balukhali camp nung kitsük-kirong lendong adoka Rohingya refugee tem aliba ki rongdoktsür aliba tanaben yanglushitsütsü asoshi aid agency balala nungi volunteer tem adenshia aliba noksa nung angur. Hombarnü atalokba kitsük-kirong lendong nungya Rohingya refugee tila-tanurtem dena nisung 15 asü aser meyirijang aika talidak ki maka kumogo.

Cox's Bazar, Metsüremi/ March 25 (Agencies): Hopta tetenzüklen Bangladesh nung refugee camp ka mi agi rongdokba nisung tajemba agi 11 asüba sülen yangji aliba Rohingya refugee temi Brehostibarnü nungi tenzüka khen atema ki yanglur.

Hombarnü atalokba kitsük-kirong lendong ya ajanga nisung 339 samar bushir, aser nisung meyirijang aika talidak maka kumogo, ta United Nations ajanga ashi. Bangladesh kübok Cox's Bazar nung aliba iba refugee camp ya alima nung tulutiba lir, kong Rohingya nunger million ka dak tema pei linük, Myanmar nungi reshikangshi tia toktsür arua jenoka alir.

Mi agi talidak ki rongdoktsür aliba kibongtemi teyari

agütsürtemi agütsüba tarpaulin, lisü aser sungkum amshia Brehostibarnü nungi ki yanglur. Medical facilities aser metsü meshiba tesemtem dena rongdoker alinung, iba camp nung tashidak tamajung poktettsü tsüpur.

"Nisung aliba ki kisüing masü saka raksatsür aliba ki-o-jen ajunga tekeratiba nung yanglutsüla," ta aid agency, Catholic Relief Services nung Bangladesh country manager, Snigdha Chakraborty-i ashi.

"Nisung takum kumzüksü aser tashidak wara nokdangtsü asoshi jana/tepok indokba tesem, tzüpo aser temang shidokba tesemtem tanaben yanglutsü ya kanga tongtipang lir."

Teyari balala agüjaka, kitsük-kirong lendong ataloker anogo pezü tashi aika jenokdak ki

maka anü tatsük nung alir.

"Ajak samaogo. Ni, kü kinungtsü aser ozü jabaso trok tang tashi moabu nung mejanger. Tanü ni süki ka angutsü imlar," ta arishi küm 50 tain, Mohammed Salam-i ashi.

2017 küm Myanmar anüolen mitkartemi Rohingya telungpur anema nokdakba mapa jena arurba refugee tem asoshi iba kitsük-kirong lendong ya timtem khuret tuluka lir.

Arem lepdoka yangluba camp tem nung nisung tali arua aliba mechi Bangladesh-i Rohingya nunger nisung 100,000 shi Bay of Bengal nung tzümetsüing kanga bulua adokba asetkong kati anir aotsü meranger, saka aid group temi anema nokdaker aser Rohingya nungeria aotsü nungnanga bilemer.

Brazil nung COVID-19 agi asür nisung 3,00,000 jungogo

Sao Paulo, Metsüremi/ March 25 (Agencies): Bodhbarnü tashinung Brazil nung COVID-19 agi asür nisung 300,000 alema iba alizüing atongba linük tanabuba akumer.

United States nung iba tetsübuttsü alizüing ya December 14 nü tonga liasü, saka yangji nütsüing yongsük Brazil dang timba lir.

Bodhbarnü COVID-19 agi nisung 2,009 asü, ta Brazil indang health ministry ajanga sangdonga iba tashidak wara agi asür nisung 300,685 akum. Mongulbarnü kisüing nung nisung 3,251 süa otsü yanglua liasü.

Coronavirus agi asüba azüingba yimya sorkari melenshiba ajanga tang tesüsa sangdonga aliba nung kongshitsü akok, ta yangji aliba osangbener temi ashi. Tang tesüsa shimteta alisang Health Minister Marcelo Queiroga-i asürtem ya nisungi ajemdaktsü asü masü ta reprangdangtsü, ta osangbener senden ka nung ashi.

Anogoshi nisung asüba tali akumer asünung, Brazil nung aliba state governor aser mayor temi April ita ya March ita ama kanga majungtsü, ta tetsübu lemsatep.

Tesüiba anogo 75 tsüngta Brazil nung coronavirus agi asüba tejangja nisung 100,000 liasü, aser ibai yimten yimsüsürtemi virus den raraba nung amalitep makaba, virus tabu tasen ka pokteta tezüpaba nung menatepa aoba aser health protocol mezüingshiba ajanga lir, ta health expert temi ashir.

Tir Jair Bolsonaro-i Bodhbarnü sorkar kongdang balala indang tekolakpur den virus anema nokdaktsü asoshi jembishinüba senden ka ayongzüka liasü. Saka pai iba senden nung tashidak wara den raratsü asoshi sentong kata mebenok.

Bolsonaro-i iba tashidak wara ya süoki ia magizüker aser timtem majurutsü atema rongsenketsüing mezüing südaktsütsü jembir aser tesem balala nung lenirtemi mera balala agia arubatem aija arur.

Israel election: Party tilaka tongtipangba kumogo

Jerusalem, Metsüremi/ March 25 (Agencies): Israel election nung meimlai alidang Palestinian-Israeli party tila kati tongtipang menden tem nung takok ngua Israel indang taruba ato kilonser shimtsü jenjang kanung lir.

United Arab List (UAL), koba dang Hebrew oshi nung Ra'am ta ajar, parnok yagi züingsem 120 aliba Knesset nung menden pongu nung

kisüing takok angur amai lir, saka ibaji ajanga Israel nung ato kilonser talangtiba inyaksang Benjamin Netanyahu ya maneni inyaktsü asü masü ta telemtetba agitetttsü.

Netanyahu asoshi ibai nüma metangtetba tensa ka lir, shibai Palestine nunger den tangatetep kati arutsü memolungi aser linük nung Arab kin tila ya kiralongrar dang aria bilemer, shirnok linük nungi atsüingdoktsü, ta tesüiba nübuyim mapang jembia temaba menden tongteta lir.

Bodhbarnü tashinung vote shilem 90 shi züingogo, aser yangji arishi küm 71 tain, Netanyahu aser par den sendaktepa alirtem aser pa den tokteper block temi Knesset nung menden 61 monguteti liasü.

Party kati tesem melenshitsü melemtet tashi telok anaprongi sorkar ka tentetttsü aser ano election agitsü aliba nungi kumzüksü mechi Mansour Abbas-i anir aliba UAL teyari nungdaktsü.

Küm ana nung Israel election pezübuba agidang, Netanyahu-i Arab nunger teyari bushi, koba vote angutsü aser Joint List sadangtsütsü nükkjidong ka ama aikai ashir. Joint List ya Arab party tem den sendaktepa lir aser taoba küm election nung otsü yanglua menden 15 nung takok ngua liasü.

Tang tesüsa agiba election nung Abbas ya Joint List nungi pila aser party balaka ama toktepa liasü.

North Korea-i tzüyim nung ballistic missile ana khaloktsü

Seoul, Metsüremi/March 25 (Agencies): North Korea-i Brehostibarnü projectiles ana tashi tendang, koba ballistic missile asütsü ta Japan-i temolung malemer, ta Seoul, Tokyo aser Washington nung aliba ketdangsürtemi ashir, aser ibai US Tir Joe Biden January ita tir menden nung mener iba ama tendangba mezüingbuba alitsü.

United Nations Security Council Resolutions kübok North Korea indang ballistic missile tem nokdanga lir, aser Brehostibarnü tendangba ya tejangja asünungbo, Biden-i Pyongyang den sendakteptsü merangba tsütsü tetsükdaktsü tasen ka ajurur asütsü.

North Korea indang South Hamgyong Province nungi anüdoklen tzüyim nung mejangjaba projectiles ana khaloktsü, ta South Korea

indang Joint Chiefs of Staff ajanga ashi.

Osang tali tejangja metetttsü asoshi South Korean aser US itdangiter temi asadangba mapang lir, ta JCS sangdong ajanga ashi.

Iba inyaksangshi indang jembishinütsü atema South Korea tir aliba Blue House ajanga national security council indang rongdak senden ka jateptsü.

US ketdangsürtemia North Korea-i projectile tasen tendangba ashi, saka kwi tendang mesüra komala projectile ka liasü, itemji mashi.

Projectile ya ballistic missile liasü, koba Japan meyong economic zone alema orr tsük, ta Japan Ato Kilonser Yoshihide Suga-i ashi.

Taruba ita Biden ajuruba mapang North Korea indang ken o kanga junga jembitsü, ta

Suga-i ashi.

Japan nunger tzükum anükertemi rong tem dang tsüka aliba oset anasai maotsü aser tzükum anüker nem osang agütsütsü shia liasü.

Hopta tatemlen North Korea-i short-range cruise missiles ana khaloktsü, ta US aser South Korea ketdangsürtemi ashi, saka Biden-ibo itemji yimya ama inyakyim ka dang lir aser Washington nung aliba ketdangsürtemi Pyongyang den jembishinütsü renema lir, ta ashi.

Ballistic missile tendangba ya hopta tatemlen tendangba nungi mera ka ajungketba lir, aser North Korea technology relokttsü melar, US-South Korea military drills asoshi telangzüba ka yoker aser United States dang par nok-o-nü tajungba renloka lir ta sayur,

ta Massachusetts Institute of Technology, United States nung nuclear affairs expert, Vipin Narang-i ashi.

Biden-i North Korea den jungteptsü merangba nung telangzüba agüja mali aser Washington-i South Korea den military drills agiba densema yimya tamajung metoktsü tashi sensaksem malitsü, ta Pyongyang-i ashir.

Tawa US aser South Korea lungjemer military exercise agiba ajanga North Korea ain adok, aser nuclear ken o jembishinü tanaben tenzüksü asoshi iba inyakyim ajema akum.

2006 küm UN ajanga tenokdangba agüja aliba nung aibelena 2020 küm tepiyong North Korea-i tanen makai nuclear aser missile yanglua liasü, ta UN sanctions monitor ajanga ashi.

R.D. Minister dang pelar



Kichutip ward, Mokokchung nung 2020 kum anentsü agi tetsüing lenmang (foot path) tongtibang shilem ka kanga mejungi raksatsüba ajanga nübortem kanga timtemba reprangteta, Nagaland Rural Development minister, Wb.Metsübo Jamir aser par jabaso Wb.Temjenmoa Jamir, NMM & CSR, Managing Director, tenati tenla tulu agüja inyaksüba agi, iba lenmang tajungba kuma December 14, 2020 nü nungi yanglutsü tenzükba March 23, 2021 anogo nung renemogo. Iba ama temeim mapa tajung inyaksüba asoshi Kiyonger Telongjem Sarasadem Telok, Kichutip Ward Mokokchung-i ozü lenir aser par jabaso tena dang kanga pelaba metetdaksür.

Tsüngremi nena taküm tajung aser arishi talang moajangma.

Sd/-
SANGLIPONG, President.

Sd/-
IMTIMEREN, General Secretary.

Noklak nung DLCC senden menogo



Noklak, Metsüremi/March 25, 2021 (TYO): Bodhbarnü, DC Conference Hall, Noklak nung Noklak District indang mezüing District Level Consultative Committee (DLCC) senden agiogo, ta sangdong ka ajanga metetdaksü.

Iba senden nung mendenbuba, DC Noklak Reny Wilfred, IAS-i, horticulture, aquaculture, handicrafts, agriculture aser tourism nung ajangzüksü atema Noklak tesem nung lenmang aika lir, ta ashi.

Item maparen ajunga indang asalentong ajungkettsütsü atema administration, külem sendaktepa alir, Department, NGOs aser aluyimertem longjemer meranga inyaksüla, ta DC-i ajungshia liasü.

Iba senden nung teloki Noklak District indang rongsenkettsüing jenjang, iba district nung banking maparen nung tayongzükba balala ajuruba aser 'priority sector lending targets' den 'customer

service point' onüktem benoka olemtep.

Telokisa, Bank indang CD ratio aser ACP nükjidong aser ajangzükbatem, district nung FLCs, Government SSS-PMSBY/PMJJBY/APY indang inyakyimtem, DUDA aser DRDA 2020-21, NSRLM Credit Linkages MUDRA aser Micro credit densema PMEGP 2020-21 aser 2021-22 atema PMEGP nükjidong indang asadangshia jembi; aser block wise MIS/Data nung senotsü maparen bendenloksü asoshi olemtepa liasü.

District nung tanga nüngdakbatem aser NABARD mapatong densema DIC, Agri aser teloktep deptt tem nungi Department indang scheme balala indang nung telok sensaksemogo.

Tanabuba session nung, 'priority sector lending' nung training ka achayanga agia liasü. Iba training nung agriculture loans, MSME (Micro, Small and Medium

Enterprise) aser education loan, housing loan, social infrastructure, renewable energy, Self Help Group (SHG), Joint Liability Group aser PMJDY nung tanga 'Priority Sector lending' onüktem ayimjema agiogo. Kasa training sentong nung PMEGP aser tanga Social Security Schemes talisa PMSBY, PMJJBY aser APY dak sendakba onüktem nung tesayuba agütsüogo.

Iba training nung shisalen sayurji District Development Manager NABARD S.Amarjit Mangang, Lead District Manager Noklak & Tuensang, Mughashe Assumi aser Branch Manager SBI Noklak Neikhotu Tachu nung liasü.

Iba sentong nung district administrations, Khiamniungan Tribal Council, Khiamniungan Menyu Hoikam, Khiamniungan Baptist Churches Association nungi teshimtet nübu aser departmental ketdangsürtem denogo, ta kasa sangdong ajanga metetdaksü.

MULUNG NEN O



TALIKANGBA IMSONG (Yaongyimsen)
16.10.1932 - 18.03.2021

Onoki teti meima aliba tsürabur, asür **TALIKANGBA IMSONG** mapang tatsüka shiranga alidang kija, kibong, arogo, yimten, kiyong kinartem, medemertem lokti balala aser temeimer shirnokisa ozü den sarasadem, nobu rongsen agi yaritepogo, nenok ajak dang ozü molung taroktiba nungi kanga pelaba lemsateper.

Tulusang Tsüngremi nenok ajak maneni moajang ta ozü sarasadem.

Temeim kinungtsü, chirmur, semchir & kinungertem.

Office of the CHUCHUYIMLANG KAKETSHIR TELONGJEM TENÜNGSANG AGÜTSÜR



Sd/-
(IMLINOK)
President

Chuchuyimlang Kaketshir Telongjem (CKT) ajanga **Mr.Odiongba** S/o Mr. Mapuonen aser Mrs. Semsakala-i 9th buba Blind and Deaf Judo Championship, Lucknow, UP nung March 2021 nung asayaba mapang gold medal (45kg category) nung takok tulu anguba asoshi kaketshirtemi pa nem tenüngsang aser tetushi agütsür.

Maneni tarutsü nung jenjang tuluba aser takok temoatsü asoshi CKT-i ajungshir aser sarasademtsür.

Sd/-
(LIMAAKUM)
Information and Publicity Secretary

MULUNG NEN O

Onoki teti meima aliba ojala ajungbena temang nung timtem ataloker taneptsü bushia jajadang nungi la iba lima nungi pilar, onok mangyim jashi nung aliba mapang tashi, ana aser talang nungi temeimertem shirnokisa sarasadem, shisatsü, nübo aser rongsen agi ozü dang meima yariogo, nenok ajak den iba osang kakat ajanga pelaba ano maneni lemsateper. Nenok temeim teyari medeniang ozü tsürabur tesüsaba anogo aser sentong topur junga metembangtella ta bilema, yangi tamalen onoki meshisemba kija, kibong, lokti tentet aser arogo kar dang tenüngteta pelaba shisemer :

1. Longjang Senso Telongjem, Dimapur
2. Nahorjan Ao Union, Karbi Anglong, Assam.
3. Mangimen Ao Baptist Arogo aser Youth Ministry (Nahorjan, Assam)
4. Naga Christian Fellowship & Naga Students' Union, Dibrugarh.
5. Er. Kalong Longchar, Longjang (Dibrugarh)
6. Dibrugarh Medical College nung doctors & Nurses.
7. Changlang Town nungi doctors & nurses.
8. Changlang Town nung Aortem aser tamangertem.
9. Mr & Mrs. Chubanungba (Longjang), Tuli.

Asen Teyanglur Tsüngremi nenok ajak moajang ta ozü sarasademtsür.

- Temeim jala-jabasotem, Anükapang & Kinungertem.



Wt. S.Aienla Aier
(Longjang)
28.01:1966 - 12.03:2021

ALI AYOKTSÜ LIR

Tasazük : 140x190
Jenjang : 150/sq feet
Tesem : Tuli Town

Lenmang nung kongshia
Ali atoktsü menüngdak
Contact : 7005745012

Tuensang nung election duty atema nübu shimogo

Tuensang, Metsüremi/ March 25, 2021 (TYO): Representation Act, 1951 indang Section 26 kübok tashi agüja aliba amshia, Tuensang District kübok Election duty atema Deputy Commissioner & District Election Officer, Tuensang, Kumar Ramnikant, IAS-i Sorkar wadang nung inyaker nübutem shimogo, ta sangdong ka ajanga metetdaksü.

51-Noksen (ST) Assembly Constituency nungi Nagaland Legislative Assembly bye-election achayanga agitsü aliba

dak sendakba nung election maparen inyaksü atema Presiding officer, 1st polling officer, 2nd polling officer, 3rd polling officer, 4th polling officer aser Grade-IV ama nübutem shimogo.

Iba election duty atema training telemsatem yamai alitsü:-

1st Round - Presiding Officers - Male Sl. No. 1-25, Female Sl. No. 1-5 at GHSS Room No. 1, Presiding Officers -Male Sl. No. 26 - 50, Female Sl. No 6-10 at GHSS Room No.

2. Date and time 31/03/2021 10:00 AM.

1st polling Officers- Male Sl. No.1-25, Female Sl. No.1-5 GHSS Room No. 3, 1st polling offers -Male Sl. No. 26 - 50, Female Sl. No. 6 - 10 GHSS Room No. 4. Date and time 31/03/2021, 10:00 AM.

2nd polling Officers - Male Sl. No.1-25, Female Sl. No.1-5 GHSS Room No. 1, 2nd polling offers - Male Sl. No. 26 - 50, Female Sl. No. 6 - 10 GHSS Room No. 2.

3rd polling Officers - Male

Sl. No.1-25 Female Sl. No.1-5 GHSS Room No.3, 3rd polling offers - Male Sl. No. 26 - 50, Female Sl. No.6 - 10, GHSS Room No. 4 and 4th polling Officers - Male Sl. No. 1-50, Female Sl. No. 1-10 GHSS Auditorium. Date and time 01/04/2021 at 10:00 AM.

Tekalen agüja aliba schedule nung shia aliba ama 4th polling ketdangsürtem indang training ya CMO Office ajanga ketdangsüa agitsü.

Tanabuba aser tatembuba round indang training ya April 9

nungi 10, 2021 tashi agitsü. Tekalen agüja aliba election duty dak sendakba nung ketdangsürtem pei pei tata tesem/ mapang nung shitak aruagi training agitsü metetdaksütsü asoshi Tuensang District kübok Head of department/ketdangsür ajak dang tetuyuba agütsür. Department ketdangsür kari danga iba election training/duty nung shilem magi tamakok aludaktsüra Election Laws agi melaba ama temerenshi tapet agütsütsü, ta kasa sangdong nung shia lir.

ISSF Shooting World Cup: India tetsür team-i silver angu

New Delhi, Metsüremi/March 25, 2021 (Agencies): Brehostibarnü ISSF Shooting World Cup - tetsür 50m rifle 3 positions team asayamung nung India tsür Anjum Moudgil, Shreya Saksena aser Gaayathri Nithyanadam nungeri silver medal nguogo.

Gold medal round tetoktepba nung India team-i shot 43 ajangzüktet. Iba asaya nung Poland tetsür team-i shot 47 tongteta gold medal angu.

Mezüng aser tanabuba qualifying round nung India-i team-i point 1304 aser 864 tashi nguteta tembang.

Poland team nung Aneta Stankiewicz, Aleksandra Szutko aser Natalia Kochanska nunger asaya liasü.

Iba tetoktepba - tetsür 50m rifle 3 positions team nung Indonesia tetsür team-i bronze medal takok angu. Indonesia team nung Vidya Rafika Rahmatan Toyyiba, Monica Daryanti aser Audrey Zahra Dhiyaanisa nungeri Hungary tsür Lalita Gaspar, Eszter Denes aser Lea Horvath madak 47-43 agi takok angu.

Kasa asayamung 25m sports

pistol final asayamung nung Chinki Yadav, Rahi Sarnobat aser Manu Bhaker nungeri pei pei tata asaya koka India atema gold, silver aser bronze ajangzüktetogo.

Shooting World Cup asayamung putiotsü nung Brehostibar anogo parnoki takok tulu ngua shilem agitetba ya record asütsü. Brehostibarnü iba asayamung medal tally nung India team-i gold medal 9 tashi ajangzüktetogo, koba kija asaya nung team kati danga iba jenjang tongteta mali.

Asayar asempronglai Tokyo Olympics atema quota nguogo, kong Chinki aser Sarnobat nati iba asayamung nung Olympics quota ngua liasü.

10m air pistol atema Bhaker-i quota ngua lir aser iba quota nung ajemdaker lai 25m pistol asayamung nunga shilem agitettsü akok. Ajisüaka, Olympics asayamung (Shooting asaya telemsa balala nungi tetoktepba ka) nung linük ka nungi shooter anati dang tokteptsü akok asünung, par asempronlga point asadangshitsü.

2019 küm Asian Championships, Doha nung Yadav-i quota ngua lir aser lai anguba quota ya tanga shooter ka den lemsatsütsü akok ta jembia arudar.

Tokyo Olympics nung shilem agitsü temulungtetba tulu nung, Bodhbarnü, 25m sports pistol final asaya nung Yadav-i kanga nendaka asayaogo. Yadav-i mezüng World Cup gold medal takok angutsü atema, iba asaya nung lai Sarnobat madak takok angu.

"Teinyaktsü jenti anüngdaka alidang, item khuret jagi asen kanga shisabuludaktsür. Itemji liakasa, asaya nung temulung agütsütsü kanga tongtibang," ta arishi küm 23 tain Yadav-i ashi.

"Iba shoot-off asayaba mapang, ozü asem rongnung shibai mezüng jenjang angutsü ta bilema masaya, saka tajungtiba asayatsü temulungtetba yur shilem agitsü tenzü. Iba asaya nung gold medal anguba atema Olympics matongdang kü nem teimla tulu agütsüogo," ta lai ashi.

Tang, ISSF Shooting World Cup nung India team-i medal 20 tashi nguogo. Item medal rongnung India team-i gold 9, silver 6 aser bronze 5 takok ngua lir.

India aser Pakistan na T20 series ka asayatsü akok

New Delhi, Metsüremi/March 25, 2021 (Agencies): Taküm India aser Pakistan na tsünga T20 bilateral cricket series asayatsü asadangdar, ta sangdong ka ajanga metetdaksü. Taoba ita linük anapronglai Line of Control (LoC) sendaka prangbong injang amshia khatepba anentsü asoshi züngzüktepba sülen, T20 series asayatsü asoshi sangdonger alitsü.

Iba series asayara, küm 8 nung linük ana tsünga mezüng 'bilateral' akar alitsü. 2012-13, küm India aser Pakistan na tsünga tatembuba bilateral series asaya liasü, kong Pakistan team India nung ODI aser T20 series asayaogo.

Pakistan Cricket Board (PCB) ketdangsür kati ashiba agi, India team den series ka asayatsü renema atatsü asoshi cricket board dang asüngdangogo, saka iba series atema India nungi osang tejangja ka magütsü lir.

"Tang iba series dak sendakba nung India nungi cricket board züngsem ka den danga jembitepa maliyongjia, iba asaya ayongtsü ama asadangteter aser onok dang series ka atema renema alitsü shiogo," ta pai ashi.

Ano külen, tawa England aser India na tsünga T20I series asayaba mapang, India skipper Virat Kohli dang taküm T20 series talila kar asayatsü atema Indian cricket board-i pa dang ashiba lemsatepogo.

Ajisüaka, India aser Pakistan cricket board nati bilateral cricket asaya tenzükshtsü asoshi osang memetetdaksü.

Bodhbarnü Indian cricket ketdangsür kati, "India team-i Pakistan team den series asayatsü asoshi osang kecha magütsü," ta ashi.

PCB chairman Ehsan Mani-i, India-Pakistan series atema shingaia tongtepratepa mali aser iba dak sendakba nung India Cricket Board den sensaksema mali, ta ashi.

Pakistan nung otongdar sangdong ka ajanga angazükba agi, T20 World Cup, koba India nung October aser November ita asayatsü renema lir, iba ya metenzükdang, series asayatsü akok. Iba series asayatsüsa kümra, anogo/mapang latettsüsa akümtsü.

Tang International cricket schedule ya kanga temesü lir. India

nunger asayartem Indian Premier League atema mazüngi inyaktsü, koba April 9 nungi tenzüka May 30, 2021 tashi asayatsü renemogo. Iba sülen, India team New Zealand den World Test Championship (WTC) final atema parnok England-i aotsü. Iba Test final ya June 18, 2021 nungi Ageas Bowl, Southampton nung asayatsü. Ajisüaka, quarantine asütsü atema India team England jelia tonger alitsü.

WTC final asayar sülen, ita ka tashi India team tour süshia mesüra tanga asayamung asayatsü lateta mali. Ajiasünung, July ya India-Pakistan bilateral series atema mapang tetemjen ka asütsü akok.

Ano külen, August 4 nungi tenzüka England nung India aser England na Test series pungo asayatsü. September 14, 2021 nu Test series nungi asaya pungobuba temer sülen India team meyipa arutsü.

Iba Test series temer sülen, T20 World Cup matongdang ano ita ka India team cricket asayatsü atema renema mali asünung, iba mapang ya India-Pakistan series atema amshitetsü akok.

Lokti tentet balalai Lamhainamdi...

(TAPAK 1 NUNGI...)

Nok-o-nü amshiba ajanga 'anti social elements' densema aliba jangja sayur aser iba ama tasü mait mapa nungi ajaki pila alitsü.

APO-i iba tasü mait mapa aitsür aser Naga nunger ajunga dang azüdokshi nungi pila kati ka akhumtsü bua alitsü ayongzüker, aser kasa mapang ozüng amshirtemi tekeratiba nung aibelener pua tapet temerenshi agütsütsü akhanger, ta sangdong ajangasa ashi.

Nagaland Peace Centre-ia

sangdong ka nung, March 22, 2021 nü Peren district kübok Lamhainamdi yimtsüng nung nisung tepsetba aitsür aser iba ama inyakyim nungi nübur ajunga pila alitsü, ta ashi.

Mejangjaba nisungtemi March 22, 2021 nü Lamhainamdi yimtsüng nung nisung asem tepsetba osang angashia aoksar, ta Nagaland Tribes Council ajanga sangdong ka nung ashi.

Mangatetep ken o ajak tatongi arua tembangtsü asoshi Naga

nunger bangdak aser zülu nung temzüng-ozüng peria lir, saka Tsüngremi agütsüba senti takum samatsütsü asoshi prangbong-injang amshiba ya taoksatsü mapa ka lir, ta NTC ajanga ashi.

Nagaland nung aliba nüburtemi yimjung aginüa aliba mapang pei kabu nung ozüng amshiba asoshi NTC-i aitsür aser ketdangsürtem dang aibelener tekeratiba nung pua tapet temerenshi agütsütsü ajungshir, ta sangdong ajangasa ashi.

MENUNGRA BILEMTETER

Asür Imtisangla, tanü angu na iba lima nungi pilar küm ka renteter-a ni! Anogo aser ita-tem süitema oaka mapang ajak nung onoki nüktzü neta na menungra-a bilemteter.

Teyangluri lemezüksüba arishi tembanger Pai anir ogo ni. Pungmanga dang sünüali. Ne temeim yimya tajung onok mulung nung teti lir aser onoki kodanga amatoktsü makoker.

Khünü anogo asenok tanaben ajuruteptsü.

~ Aba, Oja aser Nenu ana ~



Tokyo Olympics atema Torch relay tenzükogo

Tokyo, Metsüremi/March 25, 2021 (Agencies):

Anogo atsü langer aliba Tokyo Olympics atema torch relay sentong Brehostibarnü tenzükogo aser tanü nungi tenzüka anogo 121 tashi iba milen bener Tokyo tashi asemer July 23, 2021 nü asayamung lapoktsütsü.

Iba relay sentong ya Fukushima nungi tenzü, koba 2011 küm menoknok, tsunami aser nuclear reactor asem tashi 'meltdown' asüba ajanga iba tesem kanga mejungi raksaja liasü. Iba lendong nung nisung 18,000 taküm sama.

Iba torch bener mezüng asemerji Azusa Iwashimizu liasü, la ya Japan team nung asayar tongtibang ka lir aser 2011 küm lar team-i Women's World Cup takok angu.

Track suit temesüng ka semer, Azusa-i J-Village indoor soccer training center nungi iba milen tsüklök aser iba mapang la tesülen Japan tetsür football team züngsem 14 aser coach Norio Sasaki nungeri lungbanga noktak. Parnok ajak track suit temesüng semer liasü.

Covid-19 wara proktsü tsübuba ajanga iba torch relay sentong nung terepranger marudaktsü, saka TV nung live sayuogo.

"Tokyo 2020 indang milen ya Japan nunger sensopur aser alima ajunga nung nüburtem atema teimla agütsüba tesangwa ka akümtsü," ta local organizing committee indang president aser taoba mapang Olympic asayar Seiko Hashimoto-i ashi.

2011 Tetsür World Cup football nung star Homare Sawa-i iba sentong nung shilem magitet. Homare tenarong telung nung timtem aliba ajanga la anepaludar aser iba asayamung nung lai shilem magitsü.

Iba torch relay ajanga Japan nung nüburtemi iba Olympics ayongzüksü asoshi mulungteptsü ta local organizers aser International Olympic Committee dak teimla lir. Tang tashi, iba Olympics atsülangtsü mesüra thitsütsü asoshi Japan poll nung nübur shilem 80 agi mulunger.

Iba relay aser Olympics

anaprongla yagi coronavirus tashidak proktsü akok ta nüburtem tarendakba ka lir. Torch melentepa bener asemzüba mapang, lenmang tezülen fans tem dang social-distancing nung anidaktsü aser ola tulu madoktsü asoshi tetuyuba agutsü.

Ita pezü tashi agitsü aliba parade nung lokti jenti adenshia timtem adoktsüsa kümra iba relay atema lenmangtem melenshitsu, ta asayamung ayongertemi ashi.

Iba sentong ajanga Japan nung yimtsüng aser tanga tesem tezülen coronavirus tashidak proktsü akok ta nübur tsünga tetsübu lir. Ano, Japan nung alir nüburtem (general public) nem Covid-19 vaccine magütsü lir. Japan nung iba wara adoker sülen nungi nisung 9,000 süogo.

Japan nung tesem 47 konghsia iba torch relay sentong agitsü renema lir. Iba sentong nung runner 10,000 agi shilem agitsü imlar.

Tesüiba küm ka tejakdang, Tokyo Olympics anogo atsülangtsüba sülen, sen melalutsü asoshi iba relay sentong magitsü asoshi jembia liasü. Ajisüaka, Coca-Cola aser Toyota na iba relay atema senotsü teyari agüjadoker asünung, relay sentong thitsütsü tasa ya agienadok.

Tokyo tzü mopung ama Athlete tem "bubble" nung amungtsü aser Tokyo Bay, tetoktepba tesem aser training tesem nung Athletes Village telatet dang melatsü. Tanünga bubble tema nung amungtsü aser parnok athlete nungi pilar alitsü asoshi tesem renemtsütsü.

Tesüiba anogo ishika tejakdang, asayamung ayongertemi, Olympics aser Paralympics nung terepranger/fans tem memelatsü aser iba den külemi bendanglen tesem nungi volunteer tem iba asayamung nung mamshitsü sangdongogo.

Maneni, April ita asayamung ayongertemi Olympics atema tesemtem sangdongtsü. Iba Olympics atema ticket ayokba nungi million dollar 800 arutsü imlaa liasü, saka fans memelaba ajanga iba sen mengutettsüsa kümogo. Japan Sorkar tentetemi iba metokmeperibattem peridaktsütsüsa akümtsü.

BILEMDANGANG

"Tejen otsü teti shilua jembitsü menüngdaker."